

# Wosebity status za serbske šule – SŠT z jasnými žadanjemi na politiku

Hłowna a wólbna zhromadźizna Serbskeho šulskeho towarstwa (SŠT) njeje jenož předsydstwo w zastojnstwje wobkrućiła, ale zdobom wutworjenju mediowego projekta LUCIJA na towaršnosť z wobmjezowanym rukowanjom (tzwr) nošerstwje SŠT puć runała.

**Smjerdźaca (SN/MiR).** W rozprawje wo swojej dotalnej dźělawnosći předstaji předsydstwo SŠT swoje aktiwity zašlych třoch lět. Mjez tutymi běše wjace hač 30 zetkanjow a klawsurnych posedzenjow. Wužadnje za towarstwo běše wobsadźenje městna jednaćela kaž tež zapříjeće LIPY a dnjoweje maćerje w Drježdžanach. LUCIJA, mediowy projekt SŠT, móže so po wothłosowanju člonow nětko na tzwr w nošerstwje SŠT přetworić.

Wulki zajim je Beno Hojer z informacijemi wo politiskich akcentach skutkowanja towarstwa wubudził. SŠT je lisčinu žadanjow na politiku zestajiło. Nawodnej poziciji na Chróšćanskej a Pančičansko-Kukowskej zakładnej šuli matej so nuznje wobsadzić. Wupisac dyrbi so tež městno społnomócnjeného za naležnosće serbskeho šulstwa při LaSuB w Budyšinje. Nimo toho chce SŠT na postajenje

sakskeho kultusa za dźěło na serbskich a dalšich šulach w němsko-serbskim sydlenkim rumje, kotřež je wot lěta 1992 płaćiwe, wliw wukonjeć. Za to je fachowe towarstwo jasne žadanja wudžětało. Serbske šule trjebaja wosebity status, w

prěnim rjedže personalny kluč a dźělak rjadownjow nastupajo. Trěbny je tež zhromadny serbski referat na wotnožce Krajneho zarjada za šulu a kublanje (LaSuB) a w Sakskim ministerstwje za kultus. Wutworić ma so cyłk wučerjow za

serbske a serbsčinu wuwučowace šule. Tak na přikład njesměli so serbscy wučerjo hižo němskim šulam wupožćowac. Za trěbny ma SŠT tež krućiši přistup na Serbski gymnazij. Za serbskich maturantow, kotřiž wučerstwo studuja, měła garantija přistajenja po studiju z winawosću wučerjenja na serbskej abo serbsčinu wuwučowacej šuli zwjazana być. Dotal njeje tež dosć serbskorěčnych digitalnych wučbných srědkow. Tež transport šulerjow dyrbi so polěpšić. Dale ma so zastopnjowanje nawodow a nawodnicow šulow spěšnišo zwoprawdźić.

Dohromady 34 rjadnych člonow SŠT je minjeny pjatk do Serbskeho kublanskeho srjedzišća LIPA w Smjerdźacej přichwatało. Nimo dalšich zajimcow witaše předsydku Katharina Jurkowa čestnu předsydku towarstwa Ludmilu Budarjowu kaž tež předsydu Domowiny Dawida Statnika a zapóslanca Sakskeho krajneho sejma Marka Šimana (CDU). We wólbach noweho předsydstwa su přitomni předsydku SŠT Katharinu Jurkowi kaž tež dalšich, dotal w gremiju skutkowacych wučerjow Alenu Hiccynu, Dianu Wowčerjowu, Jennifer Dünnbierowu, Bena Hojera, Jana Rjedu a Romana Grzyba w swojim zastojnstwje wobkrući.



Předsydstwo Serbskeho šulskeho towarstwa – Roman Grzyb, Beno Hojer, Jan Rjeda, předsydku Katharina Jurkowa, Jennifer Dünnbierowa, Alena Hiccyna (wotlěwa) a Diana Wowčerjowa (njeje na foće) – bu po wobšěrnej rozprawje wo dźělawnosći minjenych třoch lět we wólbach wobkrućene. Foto: Milenka Rječyna